



En tuttas colurs ed en tut ils musters – Sco qua per exempel ina mascrina hawaiana.

FOTO SANDRO BUCHLI

# Tadaaa, la «mascrina» è il pled rumantsch da l'onn!

RumantschAs e lur pled preferì en l'onn da corona – la mascrina

■ (rtr/fmr) La «mascrina» è il pled rumantsch da l'onn 2020. Sin plaz dus da la rangaziun è «extraordinari» e sin plaz da bronz «positivad». Tut ils trais plets han in connex cun il coronavirus – che ha dominà las vitas da RumantschAs. Ils plets èn vegnids elegids da la ZHAW a Turitg en collavuraziun cun la Lia Rumantscha. Els han nizzegià la pli gronda banca da datas da la Svizra cun var otg milliuns texts ed 1,6 milliardas plets da 360 differentas funtaunas. Tranter auter er funtaunas rumantschas e propostas dal public.

## La decisiun

Suenter l'analisa dal corpus linguistic ed da tut las propostas, ha ina giuria dad in tratg la decisiun finala per ils top 3 plets rumantschs. La giuria, quai è in bun mix da diesch persunas rumantschas che represchentan idioms, mastergns, schlattainas e vegliadetgna. Sco victur è vegnì tschernì la «mascrina».

Sin il segund plaz «extraordinari» e sco terz «positivad».

## Daco la «mascrina»?

Dapi questa primavaira tutga la mascrina tar la gardaroba dad in e scadin. La mascrina sco object devi gia avant il coronavirus, ma pir cun la pandemia actuala è ella s'establida en l'entir mund.

Cun la furma diminutiva «-ina» dal pled «masca» reusseschi tenor la giuria da render pli charina e pli bella ina chausa ch'è atgnamain insatge uschè grond ch'i cuvra la mesadad da nosssa fatscha.

Cun il pled «mascrina» differenziescha la lingua rumantscha er cleramain dad autras mascras che cuvernan l'entira fatscha. Sco la «masca da tschaiver» u la «masca da cosmetica».

Spezialmain en Engiadina ed en Surmeir sajan furmas diminutivas derasadas. Tuttina ha il pled pudì s'establir en l'entira Rumantschia, er grazia a las medias che han adina puspè duvrà quest pled.

## Pled rumantsch da l'onn en il passà

2018	il derschalet (nausch siemi)
2017	ils flutgets (floccas per müesli, per bizochels, per scrottas da naiv)
2016	il barbajiat (mal ils musculs)
2015	il schischuri (virivari)
2014	far linlogn (sa laschar temp)
2013	il raffader (der Abzocker)
2012	l'arsuc (guaffen per trair en chalzers)
2011	tgutglar (far tup, far da tgutg)
2010	gnochergnar (far da char)
2009	la vaccinaziun
2008	europèada

La survista dals plets da l'onn. I manca 2019 – cun il pled da l'onn «luf»

GRAFICA RTR